

Vnnsern grueß vnd was wür liebs vnd guets vermögen zuuor. Ehrwürdiger fürst, besonnders lieber freundt, wir seindt eur l(ieb)d(en) gegen vnns tragenden genaigten willens solchergestalten versichert, dass alle weitere contestation yberflissig. Wie wir aber aus der an vnns abgelassenen höflichen glickhwündtschung zun heyligen weihnacht ferien dessen continuation aine seer angenehme bezeugung empfangen, also erstaten wür deroselben fr(eund)l(ichen) danckh, vnnd werden vnns befeissen deroselben in allen begebenhaiten vnnsere guete disposition im werckh zuerzaigen vnnd in deme wir iro von dem Allmechtigen zu allen zeiten alls selbst verlangende wolergehn anwünschen, verbleiben wir daneben eur l(ieb)d(en) mit fr(eund)l(icher) affection yederzeit wol beigethan. Datum Bozen den 31 Xbris 1673.

Anna von Gottes gnaden verwittibte erz-  
herzogin zu Österreich herzogin zu Burgundt  
gräfin zu Tÿrol geborne princessin von Toscana etc.

Anna